

始祖朝禕公實錄

府君諱端字朝禕唐進士諱克純之子也先世漢太邱長實居
潁川許昌歷傳至叔明因避亂遷江州傳六世晉國公旺由德
化縣遷居德安縣之長樂里爲縣著姓遂號爲江州陳氏朝禕
公旺公七世孫也以材力仕唐懿宗時授招討使僖宗朝黃巢
亂奉勅同蔣良傑起兵收勦屢戰有功授武安節度使加封威
烈將軍公經濟素優軍民共戴朝廷倚重留鎮潭州管轄三邊
斯時家長崇尙居祖地江州一門敦睦數代未分中和四年特
恩旌表門閭昭宗大順元年 勅封義門授崇爲江州長史贈

光祿大夫同光二年公以年老解組適外戚彭湊常均避地南
行遂偕入長沙之霧陽鄉喜曰此可以爲家矣相與聚於橋上
議曰天之所啟惟大吾輩遇大必居公遂居大塘彭居大田常
居大賢各得其所因名其聚議之橋曰伙散橋自是而後公功
成身退舉高爵厚祿夷然不屑意桑麻自樂理亂不聞其智勇
深沉殆所謂豪傑而知道者矣旣而與宋夫人趙夫人均以壽
考終史冊銘勳葬祭如制大博先生須溪劉公銘其墓曰前不
可有一後不可有二良有以也生子伯萬公亦復克紹前徽慶
流後裔至今瓜繇椒衍傳世無窮何莫非祖澤之縣長也乎所

可惜者世代迢遙先朝實錄文獻無徵所以生年卒月闕如也
惟葬地詳載亦以信而有徵者傳後世子孫以誌思慕云爾